

**Bukan Masa Salahkan Mana-Mana Pihak - Najib
Bernama
4 September 2011**

PETALING JAYA, 4 Sept (Bernama) -- Datuk Seri Najib Tun Razak berkata sekarang bukan masanya untuk saling menuding jari dan menyalahkan mana-mana pihak berhubung kematian jurukamera BernamaTV Noramfaizul Mohd Nor akibat terkena tembakan curi di Mogadishu, Somalia.

Perdana Menteri berkata apa yang penting sekarang ialah untuk mengambil iktibar dan cuba memastikan kejadian seumpama itu tidak berulang dalam misi kemanusiaan yang disertai Malaysia pada masa depan.

"Ini merupakan sebahagian (daripada bidang kewartawanan). Kamu boleh mengambil langkah keselamatan tapi tiada jaminan sepenuhnya (mengenai keselamatan) sebaik anda berada di kawasan konflik seperti Libya, Mesir dan Gaza di mana banyak nyawa wartawan telah hilang," katanya.

Najib bercakap pada sidang akhbar selepas menyertai keluarga Noramfaizul di pangkalan Tentera Udara Diraja Malaysia (TUDM) di Subang bagi menunggu ketibaan jenazah Allahyarham dari Mogadishu hari ini.

Beliau berkata organisasi media seperti CNN dan BBC juga telah kehilangan ramai wartawan mereka akibat terkena tembakan ketika bertugas di kawasan yang dilanda konflik.

Noramfaizul, 39, terkorban akibat terkena tembakan curi semasa kenderaan yang dinaikinya bersama petugas media Malaysia untuk membuat liputan misi bantuan kemanusiaan oleh Kelab Putera 1Malaysia ditembak ketika mereka dalam perjalanan pulang ke tempat penginapan.

Najib berkata: "Terdapat had bagi apa yang anda sediakan bagi sebarang kemungkinan. Jadi, jangan saling tuduh menuduh. Perkara paling penting bagi kita adalah untuk mengambil iktibar daripada apa yang telah berlaku.

"InsyaAllah, kita akan cuba sebaik mungkin pada masa depan bagi mencegah perkara seperti itu daripada berulang lagi. Tak ada siapa yang boleh memberi sebarang jaminan. Tapi, jika kamu tidak bersedia untuk menanggung risiko, jadi jangan pergi."

Sejumlah 23 wartawan telah terbunuh semasa bertugas di Somalia yang terus bergolak, sejak 2007.

Baki 54 anggota misi kemanusiaan juga tiba di Subang bersama-sama dengan pesawat yang membawa jenazah Noramzaiful.

Najib berkata ketika menyertai misi kemanusiaan di luar negara, soal keselamatan anggota kumpulan misi bergantung kepada keupayaan anggota keselamatan tempatan.

"Kita tidak boleh mendesak yang di luar daripada apa yang mereka boleh dan sanggup bekalkan kepada kita. Tetapi kita akan cuba pastikan tahap keselamatan adalah ditahap

yang terbaik," katanya.

Bagaimanapun, Najib berkata beliau berpuas hati dengan kawalan keselamatan untuk pasukan misi berkenaan kerana apa yang dituntut oleh pasukan Malaysia telah ditunaikan.

"Ini adalah satu kejadian luar dugaan sama sekali dan boleh disifatkan Allahyarham bukanlah yang merupakan kumpulan yang disasar pihak tertentu. Tetapi dia telah terkena akibat sesuatu yang dilakukan tanpa dijangka sama sekali oleh mana-mana pihak," katanya.

Bagaimanapun, Perdana Menteri menolak mengulas lanjut mengenai kejadian itu sehingga mendapat laporan penuh seperti dijanjikan kerajaan Somalia, yang menurut beliau akan diterima dalam masa terdekat.

"Jadi saya hendak tunggu laporan tersebut sebelum saya membuat apa-apa ulasan kerana kejadian ini perlu disiasat dengan rapi sebelum kita boleh membuat apa jua kesimpulan," kata Najib.

Ditanya sama ada misi kemanusiaan ke luar negara membabitkan Malaysia akan diteruskan, beliau berkata kejadian itu tidak harus mematahkan semangat untuk terus membantu mereka yang tidak bernasib baik.

Menurutnya, ini kerana Malaysia sudah tersohor dengan sifat pemurah dalam membantu negara lain mengikut kemampuannya.

"Cuma kita perlu membuat segala persiapan dan langkah pencegahan (insiden tidak diingini) sebaik-baiknya," katanya.

Najib turut mengucapkan tahniah kepada Kelab Putera 1Malaysia kerana menunjukkan semangat begitu tinggi dan sanggup menghadapi risiko meskipun menyabung nyawa, tetapi pada masa sama telah memberi sumbangan besar kepada negara.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=611417>